

31 OCT 2003

Mahathir-Solat (Bergambar)

RIBUAN SERTAI DR MAHATHIR TUNAI SOLAT JUMAAT DI PUTRAJAYA

PUTRAJAYA, 31 Okt (Bernama) -- Masjid Putra di sini mengalami kesesakan luar biasa hari ini apabila beribu-ribu umat Islam menyertai Datuk Seri Dr Mahathir Mohamad menunaikan solat fardhu Jumaat pada hari terakhir beliau menjadi Perdana Menteri.

Kesesakan itu sudah dijangka memandangkan ia peluang terakhir bagi orang ramai menatap wajah Dr Mahathir dari dekat sebelum beliau melepaskan jawatan nombor satu negara kepada Datuk Seri Abdullah Ahmad Badawi petang ini.

Orang ramai mula membanjiri Masjid Putra seawal 11.30 pagi. Wartawan serta jurugambar tempatan dan asing turut tiba awal bagi memastikan mereka mendapat kedudukan yang baik untuk merakamkan detik-detik bersejarah itu.

Tidak ketinggalan untuk melihat Dr Mahathir dari dekat ialah pelancong-pelancong asing yang tidak berganjak dari tempat mereka di pintu masuk masjid semata-mata untuk menatap wajah negarawan ulung itu.

Abdullah dan Menteri di Jabatan Perdana Menteri Datuk Seri Abdul Hamid Zainal Abidin adalah antara kenamaan yang turut menunaikan solat Jumaat di masjid itu.

Sebaik selesai menunaikan solat, orang ramai tidak melepaskan peluang untuk bersalaman dengan Dr Mahathir.

Keadaan agak kecoh seketika apabila terlalu ramai orang mengerumuni Dr Mahathir sebelum polis dan penguatkuasa Perbadanan Putrajaya mengawal semula keadaan.

Beberapa kumpulan dan persatuan turut menaikkan sepanduk ucapan "Terima Kasih Dr Mahathir, Jasamu Dikenang" di luar masjid.

-- BERNAMA

RBZ RBZ MOZ